

四庫全書

史部

欽定四庫全書

史部

山西通志卷十八

詳校官監察御史臣查善長

檢討臣德生覆勘

總校官進士臣朱鈐

校對官編修臣勵守謙

謄錄監生臣于時和

欽定四庫全書

山西通志卷十八

山川

二

平陽府

臨汾縣

姑射山在縣西三十五里冀州圖經西入文城郡以山為界有故堯城及堯祠山迤南姑射洞一名神居洞宋政和八年勅立又有蓮花洞西北有分水嶺莊

子貌姑射之山有神人焉 述征記堯巡登姑射山

五朝志臨汾有姑射山

通典暨唐志胥同

路史姑射山在

臨汾廣固北平陽界曰平山是為壺口山 平山一名壺口山又名姑射山酈道元以為尚書之壺口

邢雲路仙人跡詩序姑射山有樵夫遇仙人圍棋爛柯處棋石并足跡在焉 張方杲南北二仙洞記從參峪騎行八九里至白石坡更上四五里有石梯下臨無底峭壁仄立捫藤緣栢而上得坦途山至此猶

堂宇之有門也過此則峰迴磴轉仰插千尋俯憑萬仞俄而有廟翼然從覆巖下出即蓮花洞也洞口傾塞不知蓮花尚無恙否循鳥道而上為照天池池在山巔一泓瑩然為南北洞之樞紐從北洞矚南洞近在眉睫而深谿界之紆行十里乃達南洞即仙人洞也洞側有唐碑光可鑑人已而坐怪石撫孤松拭粧樓之鏡影聽石枰之棋聲唐景成子棲姑射洞蛻臥石上千歲如生後唐洪崖子亦棲此得道蓮花洞

一名鹿女洞呂陽詩鹿女已從塵外去蓮花猶傍洞
前開 王惲北洞詩南山截然如案齊東山兩崖如
抱圍 山海經海內北經列姑射在海河洲中姑射
國在海中屬列姑射西南山環之郭璞注列姑射山
名也山有神人河洲在海中河水所經者莊子所謂
藐姑射之山也備考

平山在縣西南二十五里即姑射之支也平水出焉山
海經平山平水出於其上潛於其下是多美玉

毛麾康澤王廟碑自壺口而西南二百餘里曰平山水潛其下曰平水 金志有姑射山平水壺口山汾水臥虎山在縣東三十里以形似名南為世從山

浮山在縣東南三十里相傳洪水橫流隨山消長

九孔山在縣西三十五里姑射山前九孔相通深不可測一名石孔山

礬石山在縣西北五十里有石似礬因名

分水嶺在縣西北姑射山之西乃蒲縣界北周書所謂

汾水關也分汾古通用

漫天嶺在縣東北五十里與龍角山東西相距

桃花洞在澇河渠

郇保山元大德七年晉寧地震山移將近孝子李忠家
分為二行五十餘步復合

汾河在縣西二里繇洪洞南入縣境又南入襄陵境水
經汾水西南過高梁邑西又南過平陽縣東水經
注黑水與澇水合逕高梁城北西流入於汾水又南

逕高梁故城西故高梁之墟也春秋僖公二十四年
秦穆公納公子重耳於晉殺懷公於此竹書紀年晉
出公三十年智伯瑤城高梁漢高帝十二年以為侯
國封恭侯酈介於斯邑也汾水又南逕白馬城西魏
刑白馬而築之故世謂之白馬城今平陽縣治汾水
又南逕平陽縣故城東晉大夫趙鼂之故邑也應劭
曰縣在平河之陽堯舜並都之也竹書紀年晉烈公
元年韓武子都平陽漢昭帝封度遼將軍范明友

為侯國王莽之香平也晉立平陽郡治此矣水側有堯廟前有碑魏土地記曰平陽城東十里汾水東原上有小臺臺上有堯神屋石碑永嘉三年劉淵徙平陽於汾水得白玉印方四寸高二寸二分龍紐其文曰有新寶之印王莽所造也淵以為天授改永鳳二年為河瑞元年又南與平水合得者因增淵海光三字而獻之明嘉靖時疏渠十四道後以淤徙不常廢

平水源出西南平山下東流至城西五里為平湖南流
至襄陵北門外入汾一名晉水 水經注水出平陽
西壺口山尚書所謂既載壺口治梁及岐也其水東
逕狐谷亭北春秋時狄侵晉取狐廚者也又東逕平
陽城南東入汾俗以為晉水非也

黃蘆泉在縣東二十五里源出臥虎山麓宋慶曆三年
嘗引入城

澇水一名黑水源出浮山烏嶺下合小澗溝西流經縣

境至城北高河入汾 源出烏嶺合出龍角山之濶

水高梁水又會龍神溝金水河西流至樊家莊石堰
穿永利渠唐嘗引入百金泊今有城東北西三渠

通考有姑射山又有故堯城縣滴汾沁平營五水

澮泉在縣東南二十里東亢村周三畝六分古名深泉
金易曰亢元易曰澮有神祠禱雨輒應有澮泉渠

古井在城內東南隅白塔寺前旱不涸

滿水井在縣南十里伊村五井存一不汲輒滿雖炎旱

亦然

馬跑泉在縣西南二十里周三丈深不可測

灰泉在縣西南二十五里壇底村注汾

金龍池在縣西南三十里出平山下太平寰宇記晉永

嘉中有韓媪者野中見巨卵持歸育之得嬰兒字曰

檇兒方四歲劉淵築平陽陶唐金城隨築隨壞不能

就募能成者檇兒應募變為蛇令媪遺灰誌其後謂

媪曰憑灰築城可立就竟如所言淵怪之逐蛇至平

山之麓入山穴中露尾數寸使者斬之忽有泉出穴
漚為池遂名金龍

嘉泉在縣西十里周六十五步

永利池一名蓮花池在城西北隅周四百四十步深七
尋

天井在縣北五里汾河東晉將曹抽襲趙平虜卜休於
此

堯井在堯廟殿前相傳堯建都時鑿

襄陵縣

姑射山在縣西十二里三磴山北高二百丈盤踞二十里東控龍子祠南連平山西北胥連臨汾山峪山胥平峰 喬宇姑射山記姑射自西北蜿蜒而來平其支石孔其陽三磴其鉤帶泉抱山麓而出紛紛的如星拱然予命僕夫穴蓋一石聚石而計有百十餘穴流珠噴玉皓然清瑩併歸八渠溉襄陵西北之田四十餘里而東入於汾

臥龍山在縣東南四十里高十丈盤踞八十里東連翼城山峪南連喬山西控安李村北連龜山上有三峰中峰尤高山上山下胥有泉其枝附者為龍泉頂一名崇山一名大尖山隋時千尺大蛇臥其上西嶠有臥龍祠巔有浮圖山勢旋繞一徑迤邐接曲沃東北界 陳敏監邑仲威公禱雨記臥龍祠在東山谷中左肱疊嶂右瞰平川簷楹縵迴地勢爽塏真神棲之勝所也 唐時釋曇遂寶應元年至崇山二兔引徑

入山巔起浮圖後代宗賜號慈濟云

柳溝坡在縣東二里汾渡東岸

龜山在縣東三十五里臥龍山北高三百丈盤踞四十里東連浮山翼城山峪南連臥龍山西控東張村北連離凹山山脊突起似龜石紋橫織有二峰北峰高其前附者為壽星後附者為少石

少石山在龜山後有石洞相傳留侯辟穀地側有黃石公洞

分水嶺在縣東南四十里龜山之西南北袤二十里有奇

壽星山在縣東南四十里土人名南岱

喬山在縣東南四十五里接曲沃境高四百丈盤踞五十里東南胥連翼城山峪西控狄家莊北連臥龍山山有二峰北峰尤高奇石裂紋直下如削

石牛嶺喬山東北支也相傳老子過此青牛化石蓋石色多青云

白崖在趙曲鎮東南

赤土坡在縣南十里東柴村南土脊赤

二郎溝在縣南二十里有雲幽洞相傳白犬出沒崖山
躍入崖穴田夫掘得小洞內有二郎神像一犬宛肖
因名二郎溝辛珍遊記邑南十五里溝名二郎遠望
之平原沃衍惟崇墉數十堵采入中則峰巒萃律澗
溪幽邃松柏竹卉森蔥蓊鬱懸崖聳壑蔽日拂雲
闢險而通橋路鑿崖以為陶復亭臺廊閣委曲軒

豁不數百武而全勝如畫襄陵奇觀也

龍鬬峪在縣西南二十里高三四百丈盤踞五十里東控黃崖村西連鄉寧山峪南連三嶝山北連華池峪峪胥平峰上有天橋趙孟頫詩天門高處兩仙橋相傳雙龍鬬於此其中有龍鬬神祠嶽嶽洞豁似閭闔對列三嶝山之北峪也

三嶝山在縣西南三十里後有盤龍山傍有摩雲頂高三百丈盤踞三十里東控梁段村南連九龍山西連

鄉寧山峪北連龍關峪中有一峰聳峭立雲表其形
三磴緣級而升昔人詩未雨先占嶺上雲 名山志
三嶝山在襄陵縣西南十五里其山袤九十餘里其
形三嶝其北有龍關峪內有龍關神祠 萬澍詩方
從狼尾三盤上更到龍腰九曲看

盤龍山在縣西南三十里山勢盤繞似游龍

摩雲頂在盤龍山側

九龍山在縣西南三十五里三嶝山南高三百丈盤踞

四十里東控賈朱村南連太平侯村峪口西連鄉寧
鋪頭峪口北連三磴山山脊平峰山脊九曲似游龍
之天橋

狼尾坡在縣西南三十五里三磴山南多石磴

青石坡在縣西南三十五里

兩乳山在縣西南七十里雙峰似兩乳乃鄉寧之界也
仙人坡在安李村西南相傳赤脚大仙至此石上有足
跡

平山在縣西十二里姑射之支山也高二百丈盤踞二十里東控龍子祠水源南連伯王坡北則姑射山也山胥平峰山下出泉派分十二官河山麓建祠曰勅封平水泉之神

華池峪在縣西十五里高百丈盤踞三十里東控浪泉莊西連谷家山南連龍鬬峪北連王莊峪口中有一峰峪内有石洞滴水如珠輒雨

焦石嶺在縣西十七里臨汾鄉寧岐路口山石紫黃色

上有龍祠禱雨多應

馬頰谷在姑射山文中子遊馬頰之谷遂至牛首之谿
登降信宿從者樂姚義竇威曰夫子遂得潛乎子曰
潛雖伏矣亦孔之昭喟然遂歌正月終焉阮逸註晉
州有馬頰河牛首山

龍泉頂即崇山之支也高阜有石泉

朝陽洞在故關澗北崖高四丈好事者穴之道院梁古
賓名曰朝陽元盧希古記

汾水在縣東一里繇臨汾南入縣境又南入太平境

水經注汾水又南歷襄陵縣故城西晉大夫卻犢之邑也故其地有犢氏鄉亭矣縣蓋卽陵以名氏也王莽更名曰幹昌也 水經汾水又南過臨汾縣東

水經注天井水三泉竒發西北流總成一川西逕堯城南又西流入汾 金志有浮山汾水滴水

靈泉在縣東十里深泉村平地湧出一名溫泉

滿水井二一在東南十里魚池村一在東南四十里張

相村

三交水在縣東南三十里源出崇山至興光村西合鄧水梁水為一波紋潨繞其即水經注所謂天井之水三泉竒發而總成一川者耶又西入於汾

巢溪在縣東南三十里即三交西注之水也至荆村入汾一名洗耳河一名潁水相傳巢父洗耳處水中石子如鱗潺湲細響側有土阜名箕山

石盆溝在縣東南四十里龍泉頂側巨石如盆碧水常

盈

飲虹澗在縣南二十里上有飛虹橋下通二郎溝

南澗在縣南三十九里

丹朱泉在縣西南十里景村相傳丹朱插劍得泉

娥英泉在縣西南十里薛村里東入汾相傳娥皇女英
游此

八眼井在縣西南十八里薛村里八井相連因名傳為

宋時所鑿

繫羅泉在縣西南十里浪泉村一名圓河

九龍溝在縣西南三十五里九龍山麓

蒙溪在縣西南元張著號蒙溪嘗記訓義門曰予所
居之里西南俯溪獨東一方有門而當於山凡旦夕
出入者率繇是門焉予名之曰訓義 張著蒙溪山
居詩十里如相望五里如相親

蓮花池在城西北隅

明一統志在襄陵縣按
察分司內池上有亭

平水在縣西北十五里平山下一名晉水分流經城北

梅月橋東入汾發源姑射之麓千派萬壑胥成錦紋
綺縠而襄陵民食水澤尤深於臨汾

灰泉在縣北二里泉底胥灰也水殊清

梅月泉在屏霍門外上有晉橋相傳仙客過飲橋畔題
梅月於壁

晉水在屏霍門外源出姑射山東入於汾

洪洞縣

霍山在縣東北四十里霍州東南山東有觀墮峰下有

泉砌為池南北袤十八丈東西廣四丈二尺深八尺
螭口噴吐鏘鳴叶韻山上有浮圖為級十有三高二
百六十尺

觀追峰上圓其形勢視霍若背視趙若棄獨南顧洪洞
迴翔環抱山西秀峰盈千

九箕山在縣東十三里東北接霍山之麓高二里盤踞
三十里有奇南北袤十里東西廣二十五里狀類箕
南向者九故名相傳許由隱此下有洗耳泉棄瓢池

遺址一名土山

按晉箕山當屬箕氏邑路史崇春秋之箕崇小國趙穿侵崇者非崇侯國

此亦可證箕氏之多采邑矣

餓虎崖在縣東三十里

寶崖在縣東南七里四壁截辟俯瞰澗水樵牧時獲錢寶故名明嘉靖間建堡其上

洪崖在南門外一里東西廣五十里壁立百尺澗水繞其麓昕夕衝激少徙而南

壺口在縣西南一名蜀山

英山在縣西二十五里圈頭村西望婁山南連天石上有娥皇女英祠故山以英名

婁山在縣西三十里婁村西南北接趙城羅雲山南連臨汾天石山最為孤秀上有婁山神祠元庚辰歲元帥左監軍攻洪洞西山斬首六百餘級即婁山分水嶺間也

分水嶺在縣西五十里乃蒲縣臨汾之界也

世尊峪在西山有泉

玉峰山在城北玉峰門外自九箕山來東望霍嶽西面
汾川南對洪崖

古洞在縣北五里北洞里

洪洞嶺舊唐地理志洪洞漢揚縣至隋不改義寧元年
改為洪洞取縣北嶺名

黃麓山在東村東北王永命黃臺山詩序予讀書東
村不數里有黃麓山黃麓泉時遊棲焉

松平山元庚辰元帥左監軍攻松平山破之賊墮崖死

以萬計

汾河在城西拱汾門外二里繇靈石迤南山峽屈曲至趙城石子村南流入縣界五十有五里又南入臨汾界水經汾水又南過揚縣界水經注汾水西流入於臨水汾水逕揚城西不於東矣魏土地記曰平陽郡治揚縣郡西有汾水南流者是也明季縣志舊河面不甚廣今七倍於古一望無涯漸徙而東去城伊邇

清泉在縣東十里發源董寺村西尚家泉

華池泉在縣東十里李保村南一名甘露泉一名五龍池泉水湛碧視之深黑土人傳內藏蒼龍西流入清
泉渠

澗河在縣南安流門外發源岳陽縣有二一出縣北安吉嶺一出縣西北金堆里千佛溝西南至故岳陽村合流西入縣郭盆村境經蘇堡蜀村董寺李堡諸村至城西南角四曲三灣轉而北至城西合汾水隸縣

界凡三十里 水經注汾水出穀遠縣西山西南逕
揚縣霍山南又西逕故城北晉大夫僚汾去安之邑
也應劭曰故揚侯國王莽更名有年亭也其水西流
入於汾水

雙泉在縣南二十里寶師村北

深泉在縣南三十里侯泉村東

寶泉在縣南三十里侯泉村南

東坡小泉在縣南三十里孫保村東

羊獬河在縣南引岳陽山水西至羊獬橋入河

普潤泉在縣西二十里萬安鎮西百步水混出

普濟泉在縣西二十里萬安鎮西北百步水混出

無底泉在縣東北十八里坊塢村陰晦則濁晴霽則清

土人傳
為海眼

英泉在縣西二十五里英山西南麓一名神泉水出石
甕深不盈尺汲飲不竭

霍泉在縣東北三十里發源霍山南麓廣勝寺下泉源

似臂又似刀泉涌成池池流成河唐貞元間導兩渠
一名北霍一名南霍宋慶歷時立分水碑 金大定二
十九年池湮重濬 金志有霍水分水 通考有霍
山霍水

黃麓泉在黃麓山

浮山縣

龍角山在縣南三十五里東西二峰高峙雲表一統志
以形似名 翼城志西北峰屬浮山東南峰屬翼城

唐志武德二年析襄陵置浮山縣東南有羊角山
四年以老子祠更名神山 唐武德三年縣人吉善
行言於羊角山下見白衣父老曰為吾語唐天子吾
為老君而祖也詔以地立廟 縣志舊名羊角山唐
武德間更名龍角下有珍珠洞深不可測東峰巔有
華池上建嘉潤侯左伯桃廟西峰巔建孚祐將軍羊
角哀廟 崔元明龍角山慶唐觀金錄齋頌於鑠茲
山會神之寓西對姑射北鄰天柱實通仙之秘府也

正殿肅穆廣庭森沉峰巒左右松栝交陰總虛無以
靜深也石壇重階甃甃環甃隱訣參伍洞章護持三
元表辰八月降誕每至是日展法於斯修金籙齋啓
玉帛印道家之寶王者之儀靡盛於此矣 唐李用
德晉州羊角山慶唐觀記一卷

珍珠洞在龍角山深不可測屢著靈蹟孫景文天聖
宮碑初慶唐觀之東南其峰峭拔藤蘿盤屈素有
洞宮名珍珠多歷年所唐大曆中嘗勅以玉簡金龍

按於此洞至晉天福間有奉使新羅者及至其國見
向之二寶俱汎出水中既還長安因表以進之又其
洞之內每風恬霧霽往往聞笙簫管磬之聲若鈞
天九成彷彿在耳

堯山在縣東八里即中條之西麓上有帝堯祠老君祠
金范橐帝堯廟記神山縣東有堯山栢樹森然回
環十數里其巔有堯祠在焉

天壇山在堯山南三里有石壇三級壇東有龍井

橫嶺在縣東四十里南通翼城東烏嶺北達岳陽草峪嶺而其東支遙接沁河界

司空山在縣東南二十里原名風穴因上建司空廟故易名山腹空虛過者行步有聲相傳巔舊有穴樵者納衣於穴中少頃即出唐時有虎害異僧伏之今山東北偏地猶名虎兒殿云

鳴山在縣東南二十五里南連銀洞北接司空天欲雨山颯然有聲

銀洞山在縣東南四十里西北連龍角下有金河水南達翼城相傳山上有鑛暨硃砂石碌土人因以名山而侈之為銀洞云

北谷在龍角山宋建隆二年七月晉州神山縣北谷中有鐵隨水流出方二丈三尺其重七千斤

月山在縣西南二十里南接臥龍西距漫天嶺上有金輪廟殆以垂拱故名月山也

壺口山在縣西南四十五里西接臥龍東連龍角綿亘

數十里滴水出其下 壺口山當即巢山水經注滴水即巢山之水水源東南出巢山東谷是也一名蜀山

趙家嶺在縣西十里下有西溪

西左嶺在縣西十五里南距月山西達郡城橫亘十餘里一名黃花嶺以其地產荒花故也

浮山在縣西四十里一名臥虎山屬臨汾金志襄陵有浮山汾水滴水蓋浮山本繇襄陵析也相傳洪水時

山隨水消長故名

黑山在縣北四十里一名牛首又名烏嶺為中條之別
支黑水源出於此

秦王嶺在縣北四十五里相傳唐太宗為秦王時自太
原而南破宋老生于霍邑分兵詭道潛行至此

北天壇山在縣東北二十里一名北堯山與南堯胥有
堯廟亦中條之別支也

佛嶺山在縣東北三十里即中條之右臂

祭風圪塔在縣東北四十里為邑中諸山最孤高境

風穴山唐萬歲通天二年樵者陳文樵子李八兒遇異
僧于東麓後唐清泰乙未獵人又見玉兔入孔穴以
鑷掘見聖者金身云

栢林坡在任張村月山東麓嶺半有張果墓相傳有萬
年燈

永惠泉在縣東四里天壇山西麓鑿石引泉蓄石坎中
取之不竭

南河在縣南一里源出中條自東南環城西北流至馬
臺境會丞相河即諸葛河西入汾蓮花池在河側南
坂坡下後廢

潞水河在縣南二十里源出壺口山自西南來會龍角
司空二山水至交頭河折而西流經汗水殿合濟瀆
澗北趨龍神溝至下寨橋偕金河水

源出浮山
即西溪

並入

汾明一統志潞水源出浮山縣流經府城北西入
汾河黑水在浮山縣北四十里源出黑山亦名潞水

西北流入於汾

潞水源出龍角山北流至臨汾縣東合高粱水入潞水
注於汾唐引潞水及高粱水入百金泊此所謂龍角
水也

華池在龍角山東峰之巔歲旱禱雨輒應相傳唐武德
初建慶唐觀苦乏水池水自流至觀前泊工竣而流
遽止云 孫景文天聖宮碑先是斯觀營繕之初困
於無水公輸為之失色衆人于焉疚心無何山椒之

間瀑泉噴湧枉道屈曲流於觀中號曰華池

神廚泉在龍角山天聖六年湧出古志道院之東神廚之後闕地及泉厥味孔甘其源不竭

龍池二一在縣西浮谷里建龍神廟一在天衛里建濟瀆祠禱雨胥應

楊村河在縣北二十五里發源中條由唐葛柏壁村西流經楊村合黑水黑水源出烏嶺合小澗當即澇水明志亦云流入高梁達於汾

潞水河在縣北四十里源出烏嶺下一名黑水其傍有

小澗溝合流會楊村河經臨汾縣北岳壁界又名高

河與馬臺河西入汾明洪武十一年引入臨汾城為

永利池

按唐志臨汾東北十里有高梁堰武德中引高梁水溉田入百金泊貞觀十三年為水所

壞永徽二年

刺史李寬自東二十五里夏柴堰引瀆溉田今陶善鼎復治百金泊亦引瀆水溉田乾封

二年堰壞乃

西引晉水則是瀆水為利於臨汾獨不能為利於浮山縣志稱邑境無水利獨南河灌園之

地高難於引

溉也

水經注黑水出黑山西逕揚城

南又西與巢山水會

山海經曰牛首之山勞水出

焉西流注於滴水疑是水也滴水即巢山之水也水源東南出巢山東谷北逕浮山東又西北流與澇水合亂流西北逕高梁城北西流入於汾水

按縣志澇水河一名

黑水合流諸水今尚可考但滴水自入汾不會黑水當繇水道遷移故耳

懸泉在縣東北二十里北天壇山之西巖懸崖絙垂鏗然有聲滙流成澗名清流西北流合于黑水

諸葛河在縣北六里源出中條山合南王澗水西流為

丞相河至馬臺界會南河入汾

丞相河謂霍光別墅也

栢河水源出東山

龍井在天壇山南澗中有三一在東南一在南一在西
南深不可測禱雨輒應在西南者即今之龍泊是也

趙城縣

霍山在縣東北三十里入山五里有中鎮廟廟東南有
興唐寺東十里有休糧寺又南有廣勝上下二寺

霍山勝概廣勝寺為最廣勝勝概柏居多泉石映柏
彌清柏萬株枝胥南向 上有五色花雙頭蛇萬年

燈白骨松

休糧山在縣東五十里打鼓泉自巔飄墜上有方石高數丈名說法臺土人傳休糧菩薩蹟旁有五小臺龍王聽焉臺下有拴虎石

觀鳩峰在縣東北四十里上圓

秦王坡在縣南三十里

羅雲山在縣西四十里北接汾西南連洪洞西抵蒲縣出佛峽在縣西四十里即羅雲山之石峽也山崖下墜

大小石胥似佛首

婁山在羅雲山南隸洪洞者什八九

明珠山在羅雲山東北近石明里山西南溝中有龍泉
五女原在縣北十五里

九仙洞在五女原西懸崖高千尺汾水怒濤洞中如奏
仙樂

青條谷在霍山

范霍峪在霍山馬跑泉源此峪中大石有馬蹄跡及人

半面跡土人傳二郎神聽水面帖於石云

汾河在城西繇靈石縣霍州入縣境三十里又南入洪洞境水經注汾水又逕趙城西南穆王以封造父趙氏自此始也汾水又南霍水入焉金志有姑射山汾水霍水

臥牛池在縣東南三十里伏牛臺下相傳伏羲服牛乘馬始於此旁有伏跪坑乃牛跪地也

霍泉在縣東南四十里源出霍山南麓水經注霍水

出霍太山發源成潭漲七十步而不測其深西南逕
趙城南西流注於汾水分水碑內外南北二渠北
渠分三節西北入汾南渠分五道一南霍一九成南
霍之上下流也一小霍一大霍澗槽也一清水副
霍渠經城西南入汾利澤渠至城南大澗河宋張
商英霍岳詩水涵千頃富源發四渠長

南小澗在縣南五里出霍山谷中故屯南西入汾有龍
王廟廟禱輒應名小澗龍王廟

南大澗在縣南二十里上紀落鎮南出霍山青條谷中
袤四十里西入汾上有石梁

第一河源出縣西出佛峽流經蒲縣城西至大寧縣界
入黃河山溪奔匯諸水所宗故名

轟轟澗在縣西十里石明里北源出汾西縣東流至縣
石明村又折北流入汾

北大澗在縣北一里出霍山觀音溝袤三十里西入汾
舞羊澗在縣北十里石明里南山上小泉雨集輒成河

東入汾

北小澗在縣北二十里益昌鋪出霍山谷中袤十里經跑地橋西入汾

羅雲小泉甘冽用之不竭

打鼓泉在霍山巔休糧寺左

赤壁水發源霍山西南流至岳陽縣西漏崖入地南三十里復出合澗水

觀音溝在霍山北大澗源此

馬跑泉在廣勝寺北范霍峪巔

八角井在候村里朝不盈二尺至夕常盈相傳媧皇飲

馬於此

古井在媧皇陵

太平縣

姑射山在縣西十五里自北而南亘抱縣境東對汾水
若左右翼汾西青山趙城羅雲臨汾九孔平山襄陵
三嶺胥姑射殊名也

巴山在縣東二十五里汾水西南一里高十丈有奇南
北袤三十里東西五里蘆葦懸生崖半

白波峪在縣東南三十五里永固村漢中平六年黃巾
餘賊郭泰於河西白波峪築壘禦他寇後黃巾滅壘
廢後漢董卓傳靈帝末黃巾餘黨郭泰等復起西
河白波谷轉寇太原遂破河東百姓流轉三輔號為
白波賊衆十餘萬

汾陰山在縣南二十里東西亘三十里高一里

九原山在縣西南二十五里絳州界高一里東北麓隸
太平西南麓隸絳州

馬頭山在縣西南五十里雲輒雷雨或歲一至或歲數
至或數歲一至

龍門在縣西門外大道北崖勢如削中建文中子祠
大柴峪在縣西八里有水

尉壁峪在縣西十五里有水

清涼洞在縣西二十里自縣十里至姑射山麓行石逕

五六里峻者立天曲者折竹將至洞途彌穿盤迴而入寢在姑射山半洞東面石厂前張後俯深數十武厂內南入洞上下胥石倏凸倏凹秉炬行一里不克窮一名清濂洞宋王道源蛻此

煤峪在縣西二十里賈岡堡前有水

安兒坡在北膏腴村西北十里土人傳為杵臼藏趙孤地

照望峰在縣西北二十五里姑射山巔孤峰峭立一名

龍腦峰更深見日北有神仙洞碁跡存南有勝水泉
巔望見汾水外百里

豁都峪在縣西北三十里鄉寧界有水

東陘山下有天井水

馬壁谷在南董村旁

汾水在縣東二十五里自襄陵南入縣境流逕三十餘
里而南西岸入絳州界東岸入曲沃界 水經又南
過臨汾縣東又屈從縣南西流 水經注汾水又經

絳縣故城北竹書紀年梁武王二十五年絳中地塿
西絕於汾 五行志石言于晉時晉侯方築虎祁之
宮宮去絳都四十里師古注虎祁在絳西臨汾水
金志有汾水 汾水經史村南至柴寺村東胥石底
舟不敢行

國朝雍正八年開引河於西袤百二十丈

下尉泉在縣東二十五里下尉村西北流有葦

白波泉在縣東南二十五里永固村

龍谷水在縣南二十五里源出柴村流經絳州東北十八里龍香村入汾左傳龍見絳郊即此

焦村泉在縣西南十五里焦村西北相傳獻公都晉引水入城後塞

古興泉在城西

清水泉在縣西門外少北流遶城南關而東

大柴峪水在縣西八里南膏腴里水微

煤峪水在縣南二十里賈岡堡西水微

尉壁峪水在縣西北十五里尉村北諸峪之水胥出姑射山土人名雷鳴水尉壁水源二一出西北二十五里西侯村一出西北十五里尉村金皇統四年浚渠餘流入汾

豁都峪水在縣西北三十里侯村北金皇統四年開上汾下汾分高原汾老灘汾古城汾中原汾常村汾餘水入汾 宋熙寧五年廢慈州以鄉寧縣分隸太平稷山今鄉寧山水多入太平

勝水泉在照望峰下澄澈似鑑

九汧在縣北十五里自站里莊至古城镇十里九汧

源泉在縣北發源景毛村又潛流地中至西郭村東復出

靈景泉在縣東北二十五里景毛村南溉四村田至西郭村西潛流地中村東復見入於汾

靈源泉在縣東北三十五里陳郭村西南明嘉靖時澗水墊之

國朝康熙十年泉復涓流

天井水出東陘山西逕堯城南又西南入汾

岳陽縣

霍山在縣西北九十里禹貢既修太原至於岳陽孔安
國曰太原今為郡名太嶽在太原西南山南曰陽又
曰太嶽在上黨西也索隱嶽太嶽即冀州之鎮霍太
山也按地理志霍山在河東彘縣界東正義太嶽
霍山也在沁洲沁源縣括地志霍太山在沁洲沁

源縣西七十八里

通考岳陽即霍山也亦曰太岳

屏風山在縣東四里太行餘支一名掛榜山山形具龍

虎象

尹家山在縣東六十里

洪門嶺在縣東八十里縣志跋入岳陽境非登山則入

溪山雖重崖疊嶂而勢奇峰茂林溪則清流湍急蜿蜒

蜓大小頑石間石有廉利倅劍戟平正同砥礪而勢

玲瓏之致蒼翠之色

尖陽山在縣西北七十里崇岡峭壁乃霍州界也

鳳凰山在縣西北七十里山似霄鳳捩翅上有風洞六

月凝冰所謂靈巖仙洞也

四次山在縣北十五里相傳唐公主四次修道於此

雪白山在縣北四十里上多白石望之皤如也

鐘樓崖在縣北四十里

鼇頭山在縣北五十里巉巖峻厲形似鼇頭

三稜山在縣北五十里三峯並峙孤稜峻削

仙洞崖 盛佛崖胥在縣北五十里

滲水崖在縣北六十里巨流湧出倏滲乾焉土人傳大
郎神以杖剔山引水穿山而過至今趙城縣廣勝寺

山下有水湧出即此水也

按滲水崖
即漏崖

香爐崖 饒飴崖胥在縣北六十里

蓮花山在縣北七十里霍山之支連峙七峯似蓮蕊

龍頭崖 滴水崖胥在縣北七十里

党家山在縣北九十里霍山之支

千畝原括地志千畝原在晉州岳陽縣北九十里通考
隋為千畝縣晉侯千畝之戰即此也後改岳陽

董壁山 金堆山脊在城北

安吉嶺在縣東北五十里澗水發源於此後魏置安澤
縣以在安吉之下澤泉之上也

羊頭山水經注或言沁水出穀遠縣羊頭山世靡谷

沁河在縣東北九十里一出沁源縣西北繇山一出沁
源縣東北馬開溝合流經縣境百餘里東南入沁水

縣界 水經注三源奇注逕瀉一隍又南會三水

水經南過穀遠縣東又南過猗氏縣東按岳陽漢穀
遠縣猗氏今屯留長子地 水經注沁水又南經猗
氏縣故城東劉聰以詹事魯繇為冀州治此沁水又
南歷猗氏關按元至元三十年併冀氏入縣今關址
在縣東南百里

澗河即縣城東水一出縣北安吉嶺一出西北金堆里
千佛溝至古岳陽村合流經城東門外西南至澗上

村入洪洞縣境 縣志入沁河夏秋時漲 明一統

志西南流入洪洞界合汾水

聖泉在縣東山上水出石中激之繇石鯨噴吐注延慶
觀中石渠曲折伏流三清殿下流出滙二池可畜魚
八十里川在縣東南百六十里源出長子縣發鳩山西
南入沁河 明一統志川長八十里

赤壁水在縣北六十里源出南霍山赤馬交西南流二
十里至漏崖潛入地中過南三十里復出合澗水

蘭河在縣北八十里發源保豐村東南流經唐城義寧
上縣等村至和川入沁河

朱家窩山溝源出永樂里范塞村經朱家窩侯賈村至
偏澗村西流入洪洞縣境

三交水通典冀氏有三交水

曲沃縣

喬山在縣東北四十里逵高五里太行之支山也太行
自澤達翼再折而西為喬山山麓有軒轅廟西麓有

夢感泉繇東北石磴造雙峯巔北壁萬仞徑絕鑿石
梯之石輒動搖迂道東峯之北繇山後登梯徑差曲
既躋巔羣山胥斷嶄然削成南北可三四丈東西少
廣有石室無疆道人嘗棲此其中峯祠軒轅中有石
洞窈然無際樵者嘗入聞水聲山覆洞上如橋今省
作喬相傳葬軒轅衣冠於此周子華子程本以軒轅
陵在山著問鼎文 五朝志曲沃有絳山橋山 魏
大象中周文帝大舉向河陽齊高祖率衆禦之使汾

州刺史斛律金徑往太州為犄角之勢金到晉州以
軍退不行仍與行臺薛循義共圍喬山之寇俄而高
祖至仍共討平之因從高祖攻下南絳邵郡等數城
卧龍山在縣北四十五里即喬山東峯也拔地千丈高
倍喬山東接翼城北接襄陵臨汾浮山山不甚險既
躋巔東翼城覆釜山西喬山胥似左右翼矣隋時有
龍卧此嶺複巒迴中有石井泉甘遠近胥汲此北峯
有山原寺西北別峯有浮圖一名太尖山元王惲秋

日自曲村東北登山詩太尖山前好原隰

白石山在縣東南二十里紫金山之支 呂柟白石樓

記山多白石燕人張詩嘗過而名之故樓亦以是名
云山有瀑布自嶺懸下其西一支為西溪經景明村
其東一支為白水村入西溪樓南白雲洞兩石欹倚
如門西溪之中孤嶼巋然曰釣臺而濯纓磯亦在其
旁飲牛灘在西溪岸其前為觀瀾石溪水初自山嶺
而下湍急奔注樓東南為翠微巖又其上為卧雲峰

翠嶺寄崙雲物環宿李仲南甫嘗遍閱山水曰無如
吾白石山也

紫金山在縣南十三里高五里盤踞百里西南接中條
王屋在其東南產銅金為母銅為子 唐志南十三
里山有洞

四稜寨在紫金山巔絕壁如削一名紫稜寨北拱邑城
郝家山在紫金山迤西明刑部郎中郝修已涖官清介
洪武時賜紫金山一區 呂乾健恩賜紫金山記山

東至大冰峪西至昭殿峪南至石門界溝北至沙坡
為養老計且命子孫世守之賦其稅五斗

冰巖在郝家山西山峽泉下注被於石崖春夏有冰晉
都潛水之北遙與巖對為照殿冰巖元靳榮詩遠映
朝衣環珮冷正當黼座冕旒明 明一統志山半有
泉下注石崖冬則凝而成冰故名冰巖下有龍底泉
觀音山在郝家山西

絳山在觀音山西東高西下獨受夕陽紫金山西南接

聞喜絳州界 金志有絳山絳水汾水澮水通考有
絳山臺駘祠徑庭地

大水峪在郝家山東

風洞在四稜寨東洞深莫測

青玉峽在風洞東南北二里許東西兩崖對出高數十
仞石立其間俯仰離合異態沸水北趨峽怒流石罅
至懸崖激之下注為景明飛瀑即水經注所謂奔壑
十一許丈者也又東有老子廟廟側多柏遠望不知

有山

壩頭山即喬山西峯也巔差坦爾雅所謂上正章也

蒙坑在壩頭山西十里

景明山寒松堂集景明山屬曲沃

照殿峪

汾水在縣西北三十五里西十八里繇襄陵太平來入

縣趙莊境晉趙文子食邑或曰程嬰藏真孤地也又

南逕南北兩封王村自高縣鎮會合水又西南逕高

陽村至汾陰又少折而南遶大李村北又趨而西逕
小李西李觀褚平望諸村古虎祁宮北又西逕臺神
村臺駘祠西入絳州界 水經注汾水又經絳縣故
城北竹書紀年梁武王二十五年絳中地埤西絕於
汾汾水西逕虎祁宮北橫水有故梁截汾水中凡有
三十柱柱逕五尺截與水平蓋晉平公之故梁也物
在水故能持久而不敗也

澮水在縣南二里發源翼城翔高山西南流入縣東北

東賀境循平樂衛范吉莊村至東西吉壁村踰尉村
舍官村逕徐孝子村又西逕盈村歷常村上下兩裴
莊至交里絳水挾清水來清水入絳在上裴莊西絳
水入澮在下裴莊西又西流逕南吉村安吉村其南
濟溪來會又西逕東西兩韓村又西逕金沙里香邑
草家營又西至侯馬橋又西過上馬宋郭沿上三村
至東西兩陽呈村北又西逕莊里村入絳州境 水
經注澮水又西南與絳水合俗謂之白水非也史記

智伯引水灌晉陽曰汾水可以浸平陽絳水可以浸
安邑汾水灌平陽或亦有之絳水浸安邑未識所繇
也 水經西過絳縣南 水經注春秋成公六年晉
景公謀去故絳欲居郇瑕韓獻子曰土薄水淺不如
新田有汾澮以流其惡遂居新田又謂之絳即絳陽
也蓋在絳澮之陽漢高帝六年封越騎將軍華無害
為侯國縣南對絳山面背二水古文瑣語曰晉平公
與齊景公乘至於澮上見乘白驂八駟以來有犬狸

身而狐尾隨平公之車公問師曠對首陽之神有犬
狸身狐尾其名曰菑飲酒得神則徼之蓋於是水之
上也 水經又西南過虎祁宮南 水經注宮在新
田絳縣故城西四十里晉平公之所構也其宮地背
汾面澮則兩川之交會也竹書紀年曰晉出公五年
澮絕於梁即是水也

瑣語出汲冢

周顯王七年魏敗韓趙

之師於澮

沸泉在縣東二十五里景明村源出絳縣流入縣境東

南有分水渠鐵斛

清水在城東南入絳水

濟溪在縣南五里出紫金山麓濟瀆祠側入澮水皺波
澄碧溪側滿水井流泉活活上已被楔有宋時清明
上河之風

金溝水在縣南隘口經陽城里流入澮

合水在縣北二十五里源出翼城覆釜堆名湓水繞堆
西南行入縣王村境會東壑中水二井水流始巨又

西會響水泉溫泉流益巨故曰合水以兩崖水出合而成流也又西經高縣鎮入汾

響水泉在東北二十里郇村北出土龕中自上注下潺湲有聲爾雅所謂沃泉也

龍泉在縣東北三十里溫泉村水冬溫

絳水源出絳縣西山下名沸泉繇景明村東南北趨青玉峽至下裴莊西入澮

龍底泉二一在林交村一在冰巖下晉嘗架水入絳城

拔劍泉在任莊

溢溝泉在東閭里

夢感泉在柴村孝子夢有水如飴明日探之果得泉

溫泉在東海村一名七星泉一名七星海一名龍泉

翼城縣

烏嶺山在縣東七十里山有東西通道二嶺相對曰東

烏西烏以山色黑故名翼沁之險要也一名黑水嶺

水經注澮水又西南合黑水嶺水導源東北黑水

谷西南流徑翼城北右引北川水出平川南流注之
亂流西南入澮水

澮高山在縣東南十五里又名翔臯一名翔峯產銅鐵
明一統志形如鳥翼下有灤泉 水經注澮水東
出翔高山亦曰河南山又曰澮山西逕翼城南 括
地志澮高山又云澮山在絳州翼城縣東北二十五
里澮水出此山也

千佛崖在翔臯山後一名千佛洞又名千佛窟東五里

有觀音洞又名菩薩崖與千佛洞南北相通前有樂將軍祠 唐志有澮高山

蝦蟆口在縣東南三十五里兩山夾峙形如蝦蟆雲起輒雨

百草嶺在縣東南四十五里多產草藥故名

歷山在縣東南七十里界翼城垣曲之間舊志世傳舜耕於此鄭康成曰歷山在河東綱目質實曰舜耕于歷山生于姚墟今邑北門外冰清鎮傳為姚墟

佛山在縣東南七十里澮水源出焉 水經澮水出河
東絳縣東澮交東高山 水經注澮水東出翔高山
今澮水出翔臯而澮水南源出佛山是并翔臯山佛
山胥名澮交東高山也

陵山在縣西五里起覆釜山下

覆釜山在縣西北十五里形似覆釜故名下有介之推
廟土人傳晉文公立又名小繇山

丹山在縣北二十里邑治發脈於此雨後時拾得丹砂

七寶山在縣北三十里對八寶山

蜀山在縣北三十里蜀巖道銅山之說殊屬傳會

小銀山在縣北四十里相傳金大定時產銀

天柱山在縣北四十里一名大尖峯峯巒突空如砥柱
又名卧龍山有卧龍廟

石姑山在縣北四十里南有大石挺立故名舊志昔有
龍女至此入石縫有草葉似莎裒四五尺俗呼龍女
髮旱梳之則雨下有石似牙斧又傳龍女所棄云

八寶山在縣東北二十五里山有八峯與七寶山接相傳漢河上翁隱此土人名河上翁堆

羊角山在縣東北三十里山西北峯屬浮山東南峯屬翼城

東涇山五朝志翼城有烏嶺山東涇山有澮水

家谷竹書紀年莊伯以曲沃伐翼公子萬救翼荀叔軫追之至于家谷翼侯焚曲沃之禾而還

白馬山遁甲開山圖絳山東距白馬山有水

紫谷在白馬山西

澮河出烏嶺又一流出佛山下合流而西入汾水經
注澮水出翔高山西逕翼城南又西南合黑水嶺水
導流東北黑水谷西南流逕翼城北西南入澮水澮
水又西南與諸水合謂之澮交又有賀水東出近川
西南至澮交入澮又有高泉水出東南近川西北趨
澮入南紫谷水東出白馬山白馬川西逕焚庭城南
而西出紫谷與乾河合即教水之支川也其水西與

田川水合水出東溪西北至澮交入澮又有女家水
出於家谷有范壁水出於壁下西北流至翼廣城合
而西北流至澮交入澮澮水又西南與絳水合又西
至王橋注於汾水 祝志源有二一出翼城縣東烏
嶺西經縣南一出絳縣東北四十五里大交鎮東流
至鎮西與諸水合至曲沃東五里西入於汾

灤水出翔臯山一名靈泉分流二渠至李村合澮水

沙泉在邑下流村西合灤水 明王泰記縣城南半舍

許下流里之西有二泉即志名沙泉者也流而溉白馬里西尹東尹二村田當即白馬川

賀水出絳縣東賀村流經縣境馬宣莊西合灤水邑志水經所謂有賀水東出近川西南至澮交入澮者也澮水雲水灤水賀水至縣西南二十里合雲村合流

汾西縣

姑射山在縣西六十里迤邐而南二百餘里蟠襄襄陵

臨汾境有九龍西頂龍祠水泉仙人祠山麓石門名真人洞山巔廟名真人祠

洞泉崖在縣東十五里懸崖內有古洞深五丈有奇內
萬清泉深一丈有奇

商山在縣東南六十里峭壁崇巖上有商山神廟

九仙洞在縣南六十里石壁峭立俯臨汾水壁有洞口
相傳九仙人穿石修煉於此洞殊邃窈時聞樂聲

聖水山在縣西五十里山有聖水時出不竭澄澈似鑒

汾西山在縣西六十里連姑射山金志汾西有汾西山
汾水一名青山產鐵

青山與姑射連阜繇山麓暖泉頭陟第一天門第二天
門路繞羊腸石擎鰲足乃陟巔真武祠祠前方池一
縱橫丈許左有蓮花洞山產鐵一名汾西山北周
保定二年十月戊戌詔唐堯疎葛之衣粗糲之食尚
臨汾陽而永歎登姑射而興想元孫文通廟碑記
縣西境胥山其中最鬱鬱蒼蒼而挺拔者青山也山

連阜姑射故亦以姑射名重岡疊巘萃律萬仞枝峰
蔓壑磅礴百里谷巖互映而幽邃林木蒼蔚而芬榮
空翠鴻濛烟霞明媚非塵寰之觀乃仙游晦跡之境
也

石佛崖在縣北三十里高三丈廣四丈有奇環崖胥石
佛像

風吹巔在隰州界

乾河鎮洞在城內洞窈邃水出入其中入汾河

汾河繇靈石流繞縣東經霍州趙城縣入洪洞境

泊池在東門內元天曆初濬

轟轟澗在縣東十五里澗東南有淵逸真人祠下有潭
深不可測祠後有石洞澗中有穴望前壚而出聲望
後吸而入聲其聲如雷 霍志流經霍州城西南入
汾澗合邑西北之水滙於東南而注諸汾

李安莊洞泉在縣東十五里

衛家灘在縣東南七十里南通洪趙兩山峻峙陡臨深

澗

團柏澗在縣南五十里

北井溝泉在縣北二里溝中斂泉為池

小潺澗在縣東北五里古名白龍泉下為池一名銀澗
東流於霍會入汾

靈石縣

絳山在縣東四十里介子推隱此一名介山高五里盤
踞七里北跨介休東南接石膏山又東南接沁源霍

岳盤袤遼邈隨地異名山下有小水河山內有樂室
四壁高峻中丞平原相傳晉錮樂盈於此 五朝志
靈石有介山有靖巖山

抱腹山在縣東四十五里即抱腹巖接介休地巖高出
雲表秋冬之交山下微雨山上業大雪數尺

翠峰山在縣城東高半里盤踞一里石壁巉巖巒聳林
茂

馬跡巖在縣東三十五里石上有馬跡

屏風石在縣東四十里三清寨上乃繇山峯也高踰百丈有奇厚數十丈如屏風然名屏風石下有清泉馬頭山在縣東四十里抱腹巖南山勢聳出可望平陽禪房巖在綿山內有石洞深入百尺風雨不侵泉深三尺不涸不溢

柏槐巖在縣東五十里連抱腹巖

拖風澗在縣東山中不可躋陟名澗而實山也

搖車纏在縣東山勢最峻險

韓侯嶺在汾河東省志霍州北八十里今為高壁鋪

通考東南有高壁嶺汾水關皆險固之處 靈石有

韓信嶺志傳多譌按漢書曹參傳參從韓信擊趙相
國夏說軍於鄆東大破之信下井陘而令參還圍趙
別將戚將軍於鄆城中戚將軍出走追斬之鄆城即
古鄆城泊蘇林曰鄆太原縣今介休地介休南即靈
石是必夏說嘗阻崔鼠谷之險而信據嶺以扼其要
乃克破之於鄆城東耳

尖陽山在縣東南七十里遞高十里盤踞十五里東接沁源縣陡峻挿雲春恒積雪

石膏山在縣東南七十里對尖陽山東接沁源縣遞高十里盤踞十五里有上中下三巖峰巒壁立溪壑幽深中產石膏仁義河源此上有數石洞石膏滴湍輒沒石巖下佛像左為龍洞水冬夏不盈涸

十八盤山在石膏山南山勢陡險上下盤旋十八曲

孝文山在石膏山東十餘里傳孝文帝寓此

魚兒川谷在東南

竹竿坂在縣南十里

逍遙山在縣南五十里

魯班纏在縣西南四十里汾河北上有寺傳為魯班所
修後有石穴最深杳大風四時不息蓋風洞也

馮家溝原在縣西南張志里接汾西境

王禹原在縣西南道美里

石門峪在縣西四十里

文殊原在汾河西上有聖松樹枝葉橫長相傳文殊坐現於此

秦王嶺在汾河西上有馬跡

老生寨對秦王嶺恐涉附會時老生實阻霍邑不出

也然自唐閭光度應聖廟記有嶽神幽贊之說而金仇守中謂指唐谿路則神指徑遺跡未可謂盡屬無稽

印馬峪在縣西接隰州境

望川原在縣北七十里東西鋪頭兩界

桑平峪在縣北

舒江峪在縣北接孝義境

東山在縣北小水鎮東巒聳林密

興地峪在縣東北

蛤蚧嶺 唐高祖兵至賈胡堡復使大將軍府戶曹參

軍守并州

魚鼓洞在雙白里深靜村山峪相傳張果老漁鼓化石
擊之聲似漁鼓然

汾河由介休東南流經縣境冷泉兩渡等地直逼縣城

北合小水河環繞縣西復轉而東抵翠峯山下折而西南經魯班纏合郭家溝水至南關鎮合仁義河南入霍州界

雙河在縣東一百七十里源出雀兒山巖東流入沁河仁義河在縣東南七十里源出沁源縣流經尖陽石膏諸山南歷西村道遷村仁義鎮會石門溝柳溝羅兒溝青石溝諸河至南關鎮入汾

石村溝河在縣南五里會東山水入汾

野泉在縣南十里味甘

新水峪河在縣西南六十里源出隰州回馬印馬峪又
會孝義柏枝峪諸水流經雙白等村至秦王嶺南入
汾

懷來峪河在縣西十里入汾河

石門峪河在縣西四十里源出孝義舒江諸山峪會流
經金莊文學諸里至夏門鎮入汾即西河也

乾龍池在縣學西北隅

平泉在縣西北三十里入景家溝

方泉在縣北七里

冷泉在縣北四十里味寒冽下通汾河水之盈涸視汾

河為消長

水峪溝河在縣東北十里入小水河

小水河在縣東北五十里源出綿山興地峪白石谷又
合柏溝峪河曲美峪河流經集廣靜昇尹方等村至

縣北水頭鎮入汾

郭家溝河在韓侯嶺常家山中會流經魯班纏入汾

景家溝河在索洲鎮汾河西通孝義郭堡等村諸溝水

入汾

桑平峪河在冷泉河西十里入汾

賀家溝河在曹村北通文學里諸溝水入汾

石門溝河在仁義驛北入仁義河入汾

柳溝河在仁義驛東入仁義河入汾

青石溝河在道遷村入仁義河入汾

曲美峪河源出綿山箭霍谷諸溝水流入梧桐等村與
小水河同入汾

自濯池在寄樂園清濁異候

柏溝峪河在神林源綿山樂室諸澗水流經張岫等村
與小水河同入汾

興地峪河在柏溝村北源出介休五龍纏靈石北塔溝
諸澗水流經旌介等村合小水河入汾

霍州

霍山一名太岳一名霍太山在州東南三十里逋高三
十里主峯高百丈有奇盤踞一百十七里南接趙城
北跨靈石東抵沁源古為冀州之鎮今封霍嶽中鎮
祠在山麓前代有祭碑 山西有觀埽峯乃圓峯也
形勢突兀巔注打鼓泉山中有鷄掌凹下分四峪義
成峪楊家莊峪東王村峪胥有水石鼻峪在州東三
十里迤至州南彘水源此霍州境環繞胥山寶胥霍
之麓也 夏書既修太原至于岳陽 壺口雷首至

於太岳 孔傳三山在冀州太岳上黨西 正義地
理志云壺口在河東北屈縣東南雷首在河東蒲坂
縣南太岳在河東彘縣東是三山在冀州以太岳東
近上黨故云在上黨西也 周禮職方河內曰冀州
山曰霍藪曰陽紆川曰漳浸曰汾潞 爾雅西南之
美者有霍山之多珠玉焉 國語宰孔謂晉侯曰景
霍以為城而汾河涑澮以為淵韋昭注景大也大霍
山名今在河東彘縣 風俗通霍山言萬物霍然大

也 杜預注縣東北有霍大山史記原過受神人書
稱予霍大山山陽侯天使也又蜚廉於山得石櫛仍
葬也 徐廣曰霍太山在河東永安縣 隋開皇十
四年詔以霍山為霍州鎮歷代因之號曰中鎮 通
典霍邑有霍山即職方冀州之鎮一名太岳山禹貢
所謂岳陽 元和志霍山一名太岳在霍邑東三十
里 唐禮樂志五岳四鎮歲一祭各以五郊迎氣日
祭之東岳岱山於兗州東鎮沂山於沂州南岳衡山

於衡州南鎮會稽於越州中岳嵩高於河南西岳華
山於華州西鎮吳山於隴州北岳恒山於定州北鎮
醫無閭於營州東海於萊州淮於唐州南海於廣州
江於益州西海及河於同州北海及濟於河南又曰
霍邑有西北鎮霍山祠是霍山不列中鎮而別稱西
北鎮也 通考太岳在今平陽郡霍邑縣即霍山也
岳陽即霍山也亦曰太岳 喬宇記繇谷口八十五
里至鎮下其形勢可伯仲於諸岳冢秀而翠翼拱而

隨廟在山麓廟外皆山分脈合抱以繞其前古松數
株如青幢鐵幹枝皆東向巔去廟尚三十里 尹耕
曰冀舊鎮霍也分并而恒始鎮也 閻若璩曰崧高
維嶽謂崧然而高者維是四嶽之山非以太室山為
嶽名曰崧高也爾雅撰於三百篇後緣此遂實指崧
高為中嶽太史公又出爾雅後并補注堯典曰中岳
崑崙也是殆忘却禹貢之太岳矣將堯有二中岳耶
漢武登禮太室易曰崑高中岳名益顯皆為爾雅所

誤者或曰然則周竟無中岳乎曰周仍以唐虞時太岳為中岳矣觀職方河內曰冀州鎮曰霍山可知蓋自有宇宙便有此山黃帝正名百物早以定五嶽之稱禹主名山川又從而奠之下迄周秦悉不敢移豈有如武帝以衡山遠移南岳之祀於灊霍山者乎嘗愛鄭康成注大師樂四鎮五嶽取諸職方九州之山而徧足少嫌其以嶽山為西嶽而不以霍山為中嶽又嫌其大宗伯注乃襲爾雅雜以嵩高忘却大司樂

注殆由未善讀崧高之詩也哉 恒山志禹承四載
以行始於霍山徊集五嶽唐虞都冀以霍太山為中
岳以岍為西嶽爾雅所謂岍西嶽也 嶽祀尚書大

傳中祀大岳霍山貢兩伯之樂焉夏伯之樂舞縵或
其歌聲比中謠名曰初慮羲伯之樂舞將陽其歌聲
比大謠名曰朱干 舜巡四岳中祀大交霍山樂與

元祀岱泰山同 夏伯夏官司馬棄為之羲伯羲叔
之後 趙世家晉獻公十六年趙夙為將伐霍霍公

求奔齊晉大旱卜之曰霍太山為祟使趙夙召霍君
於齊復之以奉霍太山之祀晉復穰 水經注山有
岳廟廟甚靈烏雀不棲其林猛虎常守其庭又有靈
泉以供祭事 隋開皇十四年閏十月詔冀州鎮霍
山就山立祠及河瀆並取側近巫一人主知灑埽並
命多蒔松柏其霍山雩祀日遣使就焉十六年正月
又詔東鎮晉州霍山鎮若修造准西鎮吳山造神廟
括地志三神祠今名原過祠今在霍太山側也

唐開元十一年勅霍山宜崇飾祠廟秩視諸侯蠲山下十戶以為灑埽晉州刺史春秋致祭天寶十載封霍山為應聖公 宋乾德六年祭中鎮霍山於晉州政和二年封應靈王 元封崇德應靈王 明改稱中鎮霍山之神 漢武帝移衡山之祀於霍山郭璞謂在廬江灊縣與山西霍山別

千里徑在州東二十里霍山下

陶唐谷在州東三十里中有玉泉西流漢書瓚注永安

唐城堯所都也東去彘十里避暑語殊近俚祝志堯嘗遊此羣峯四合孤泉獨噴叢壑茂林繡錯殊狀義成谷在州東南三十里中有水西流名義成渠

鷓鴣掌凹在霍山中相傳妖蛛鬪龍於此

石鼻谷在州南五里彘水亦名石鼻渠谷中有朝陽洞冬不甚寒

鑾鈴原在州南十里唐太宗過此掛鈴

南坡在州南十五里

聖佛崖在州西南十五里汾水東上有石佛千餘

金鞍嶺在州西十里唐太宗息馬卸鞍

風吹嶺在州北十五里

觀埵峯在州北十五里霍山西上有宣貺真君祠即遺
趙襄子朱書者也後人集木於南麓將建祠夜聞召
諸村食牛聲雞鳴牛胥逸出比曉木遂移山巔至今
南麓有運木蹟云觀埵當即觀阜趙襄子祠三神於
百邑使原過主之世謂其處為觀阜

北坡在州北十五里

鳳樓嶺在州北四十里鳳樓鄉霍山元張藻梁秉鈞墓
碑已斁按察納延總軍與公南向由回牛鳳樓二嶺
遂下平陽霍州今北郭門外有鳳樓橋元元帥程榮
建以走鳳樓嶺道名

回牛嶺在州東北霍山金河東南路都總管胥鼎疏霍
州回牛鳳樓嶺諸阨戍卒乞量留偵候

蛤蟆嶺在州東北五十里靈石界以形似名

汾河繇靈石縣南關鎮南流入州境經城西又南下趙城縣水經汾水又南入河東界又南過永安縣西

水經注故彘縣也周厲王流於彘王莽更名黃城漢順帝陽嘉三年改曰永安縣霍伯之都也歷唐城東瓚注漢書云堯所都也東去汾十里汾水又東與彘水合水出東北太岳山即霍太山矣上有飛廉壇山有岳廟廟甚靈汾水又南逕霍城東故霍國也汾水又逕趙城西南

彘水源出州南石鼻谷西流合州東八里大張村古魚池東十里丘家崖下章丘泉諸水經城西南入汾水經注彘水出汾東北太岳山禹貢所謂岳陽也即霍太山矣又西流逕觀阜北又西流逕永安縣故城南西南流注於汾水五朝志霍邑有霍山有彘水

通考

金志同

章丘泉在州東十里丘家崖

圓泉在州東南十五里陰地村

打鼓泉自霍山頂下注 水經注霍太山有靈泉以供
祭事鼓動則泉流聲絕則水竭湘東陰山縣有侯曇
山上靈壇壇前石井深數尺居常無水及臨祈禱則
甘泉湧出周用則已亦其比也打鼓義當取此山頂
注下聲如播鼓其說殊淺

霍泉發源霍山南麓分南霍北霍二渠以溉霍州趙城
洪洞田 水經注南霍水出霍太山發源成潭漲七
十步而不測其深西南逕趙城南西流注於汾水

方池在州南十五里郭莊村興國寺下廣盈一畝淵邃
瑩冽引渠溉田入汾

碧玉泉在州西北十里許村崖下

藍腰溝在州西北三十里靈石界左山右河

三里溝在州北五十里左右大山

邢家泉在州東北三里

龍池溝在州東北三里

羅頭泉在州東北三十五里馮村東溝

師家泉在州東北三十里

馬跑泉在州東北四十里唐太宗馬蹄跑得泉時杜十萬以餉師功賜此泉按馬跑泉蹟傍山細徑當在杜莊村旁泉蓄為潭所謂寒潭勝概也

轟轟澗源出汾西縣西十五里流經城西南入汾水聲如雷

玉泉出陶唐谷山半瑩潔似玉

山西通志卷十八